



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 3

**International High Jump Gala  
Elmos: Tejaswin-i gold angu**

**Israel-i Rafah yimti amaktsü renemer,  
linük balalai tekumdangtsü ashir**



VOL. XXI ISSUE NO. 120 (ADOK 120) DIMAPUR TENTONÜ (MONDAY) TSÜKLAI (FEBRUARY) 12, 2024 ₹ 5.00

## Tanü nungi HSSLC & Class 11 Promotion Examination tenzüker

**Dimapur, February 11, 2024 (TYO):** Hombar nungi Nagaland Board of School Education (NBSE) HSSLC examination 2024 tenzüktü.

Nagaland kübok tesem balala nung examination centres 68 nung kaketshir 17,911-i stream balala nung HSSLC examination agütsütsü. Parnoki Arts, Commerce aser Science streams tatidang agütsütsü. Maneni centre 20 nung kaketshir 274-i HSSLC Compartmental Examination agütsütsü.

February 13, 2024 nungi NBSE HSLC examinations tenzüktü. Taküm examination centres 95 nung kaketshir 22,136-i tatidang agütsütsü. Maneni, centre 16 nung

kaketshir 449-i HSLC Compartmental Examination agütsütsü.

February 12, 2024 nungisa Class 11 Promotion Examination 2024 tenzüktü. Iba tatidang ya nikongdang 1:00 ako nungi nikongdang 4:00 ako tashi agitsü.

Nagaland nung registered higher secondary schools 185 nung kaketshir 20,166-i Promotion Examination agütsütsü.

NBSE aser Chief Minister Neiphiu Rio-i kaketshir ajak moatsüba metetdaktügo.

"Tatidang mapang kaketshirtemi meranga azüngtsü, temulung agütsütsü, tamang akatsü ayongzüker" ta CM Rio-i ashi.

## Regional oshi 13 nung CAPF recruitment exams agitsü

**New Delhi, February 11, 2024 (Agencies):** Centre-i regional languages 13 nung CAPF indang Constable (GD) mapa atema recruitment exams agitsü ta Union Home Minister Amit Shah-i metetdaktü.

CAPFs nung Constable (GD) examination ya Hindi aser English dak alia regional languages 13 nung agitsü ta Deobarnü Union Home Minister-i ashi.

"Nisung lakh 48-i iba tatidang

agütsütsü. PM Narendra Modi-i asen lanurtem pei tetsü oshi amshia tashi aiba mangdang ataloktsü atema lemtet ya agir. Constable (GD) examination agitsü ajak moatsür" ta Amit Shah-i ashi.

Hindi aser English dak alia Assamese, Bengali, Gujarati, Marathi, Malayalam, Kannada, Tamil, Telugu, Odia, Urdu, Punjabi, Manipuri aser Konkani oshitem nung Constable (GD) examination agitsü.

## Assam cabinet-i UCC atema lemtet magi

**Guwahati, February 11, 2024 (Agencies):** Honibarnü Assam cabinet-i state nung Union Civil Code (UCC) tenzüktü onük kecha lemtet magi.

Uttarakhand sorkari February 5 nü assembly nung UCC bill benokba sülen Assam sorkaria UCC bill ka yanglutsü tebilemba aliba Chief Minister Himanta Biswa Sarma-i shia liasü.

Yashi senden nung cabinet-isa Christian healing dena magical healing inyakyim noktangtsü atema bill tasen ka benoktsü mulunga agizük.

"Sayatenya agi taneptsü angutsü anepalubayim nungi nübertem kümzüka ayutsü atema state cabinet-i Assam Healing (prevention of Evil practices) Bill, 2024 mulunga agizükogo. Iba bill ajanga taneptsü agütsütsü ta shia ozüng alema inyaktertem merenshitsu" ta Minister Jayanta Mallabarua-hi ashi.

"Sayatenya agi taneptsü angur ta shia sensakertem aser makamaitertem dang nungi sen meshia agirtem merenshitsu aser parnok inyakyim noktangtsü. Iba bill kübok Christian healing dendaktsütsü" ta paisa ashi.

## Justice S Vaidyanathan-i Meghalaya Chief Justice inyaktü

**Shillong, February 11, 2024 (Agencies):** Deobarnü Justice S Vaidyanathan-i Meghalaya High Court nung Chief Justice inyaktü atema tezüngzüktep agiogo.

Raj Bhavan nung Governor Phagu Chauhan-i Justice Vaidyanathan nem tezüngzüktep agidaktü.

Justice Vaidyanathan-i Chief Justice Sanjib Banerjee melenzüker. Yaküm November ita Banerjee kümsük agi tonger sodi ngua liasü.

Justice Vaidyanathan ya 1962 küm aso aser D.G. Vaishnav College nung Economics azüng.

1982-85 tashi pa Madras Law College (Dr. Ambedkar Government Law College) nung azüng aser 1986 küm Post Graduate Diploma in Personal Management, Labour Welfare and Industrial Relations azüng.

Vaidyanathan-i Madras nung aliba High Court of Judicature nung inyak. 2013 küm pa High Court of Judicature nung Additional Judge ama ajungket aser 2015 küm iba court nung permanent Judge ka aküm.

Madras Book Agency ajanga adokba Labour Law Books nunga pai Editor inyakogo.

## Tanü Bihar floor test agitsü; Deobar senden nung JD(U) MLA 3 maden



**Patna, February 11, 2024 (Agencies):** Bihar nung sorkar yimsü asüba Janata Dal-United (JD-U) atema tebilemtsü ka ajuruogo aser ibaji Deobar nikongdang MLA tem tongtipang senden ka ayonga amendang JD-U MLA 3 maden.

Hombarnü National Democratic Alliance (NDA) sorkar indang floor test agitsü lir. Honibarnü minister Shraavan Kumar'er kidang senden ka amendanga JD-U MLA 6 maden.

Züngsem 243 agi akümbe Bihar assembly nung JD (U) MLA 45 lir. Maneni, Bharatiya Janata Party (BJP) MLA 79, alliance partner Hindustani Awam Morcha-Secular (HAM-S) MLA 4 aser independent MLA ka lir. Parnok ajak meyokteper NDA MLA 128 lir aser külen Grand Alliance (GA) MLA 115 lir. Bihar assembly nung majority mark atongtsü atema MLA 122 alitsüla.

Tanü senden nung madenba JD-U MLA züngsemtemji Rupauli MLA aser taoba minister Bima Bharti, Sursand MLA Dilip Ray

asir Barbigha MLA Sudarshan Kumar nunger lir.

"Onoki nübo teimba sayutsü. MLA ana-asekma maru saka parnok party dang shiogo. Asüngnep parnok ajak arutsü. NDA MLA 128 lir aser onoki ibaji sayutsü" ta JD (U) minister Vijay Kumar Chowdhary-i ashi.

"Onoki ayongayonga dang majority angutsü. Shisabulutsü madoker" ta CM Nitish Kumar-ia ashi.

Honibar senden nung madener rongnung JD-U MLA Gopal Mandal-ia "MLA 2-3 tanü senden nung maden saka parnok onok den osang metetpeladar" ta ashi.

BJP MLA tem Bodh Gaya nung anog ananü training camp ka nung aden aser parnok Deobar nikongdang Patna tonga aruogo. Parnok deputy chief minister Vijay Kumar Sinha'er kidang adenshi.

"RJD pur tsübur. Par MLA temi mashii mapang nung parnok toktsütsü meteta lir. RJD MLA temi kibong ka nungi dang yimsü asüba aser ochimashi politics

laktetogo. MLA tem tashiyim agi aayangertem ama inyakdaktüsü ajaanga democracy tashimait kümdaktsür. Putu 21 buba nung 'Bihari' ta mezüngmeshirtem anema tangatetba lir" ta deputy CM Vijay Kumar Sinha-i ashi.

"Kechiba RJD MLA tem taoba deputy CM Tejashwi Yadav'er kidang shibanga ayur? Onoki takok angutsü" ta BJP MP Ravishankar Prasad-ia ashi.

HAM-S tanishir aser taoba chief minister Jitan Ram Manjhi-ia Nitish Kumar pusema nungitba metetdaktügo.

Deobarnü HAM-S MLA tem Manjhi'er kidang senden amen. "NDA nung nübo ajak shitak lir. Tanü onok ajaki PM Modi lenisüba akhümtsübur. MLA ajak (BJP, JD-U, HAM) asüng alitsü" ta Manjhi-i senden amenba sülen ashi.

Külen Mahagatbandhan (Grand Alliance) nung opposition RJD aser Left MLA ajak Honibar nikongdang nungi deputy CM Tejashwi Prasad Yadav'er kidang amonger.

Taoba chief minister Rabri Devi-i Deobarnü MLA ajak den ajurutepogo aser Congress state president Akhilesh Prasad Singh-ia Tejashwi'er ki semdanga liasü.

RJD MLA 79 nungi 78 aser Left party tem nungi MLA 16 tashi Tejashwi'er kidang amonger ta osang angazüker. RJD MLA Neelam Devi bo Patna nung lar kidang dang lir.

## Wokha DC-i NH-61(NH-2) nung "mop up exercise" tuyur

**Wokha, February 12, 2024 (DIPR):** Wokha Deputy Commissioner Ajit Kumar Ranjan, IAS-i sorkar ali nung ozüng alema yangluba kiojen agientsü atema 'mop up exercise' alitsü tetuyuba agütsügo.

Iba mapa ya February 12, 2024 nü inyaktü ta Wokha Deputy Commissioner-i metetdaktü.

"June 19 & 30, 2023 aser February 1, 2024 anogotem demolition/clearance exercises inyakba ama Wokha district nungü Km 83.000 tashi nung February 12, 2024 anepdang 7:00 ako nungi inyaktü" ta Wokha DC-i sangdong ka nung ashi.

Iba mapa nung EE, PWD (NH), Kohima Division; EE, PHED, Wokha, Nagaland; EE, Power, Wokha, Nagaland; Lotha Hoho aser Joint Action Committee Wokha nungi nübo asemsem adentsü ta paisa ashi.

**Lotha Students' Union-i metetdaktü:** Külen, Lotha Students' Union

(LSU)-ia All Nagaland Private Schools Association (ANPSA) Wokha Unit dang tanga tetuyuba ka magütsü tashi district nung shisaliok rejutem shibanga atatsü mepishia metetdaktügo.

"Wokha nung civil society organisations (CSOs) ajanga mokdang ayongba ajanga traffic nung timtem ajurur aser iba ajanga kaketshirtem, tesayurtem aser ketdangsurtemi tetsükdaktsü ajurutsü aser lendongi aitsü akok" ta LSU-i ashi.

Ajisüaka mokdang kübok High School Leaving Certificate (HSLC) aser Higher Secondary School Leaving Certificate (HSSLC) Examinations kaketshirtem maden ta parnokisa shisem.

"Ozü kaketshirtem aser tesayurtem lendong nung jenbua ayutsübaji kanga tongtipang aser iba lemtet ajanga shisaliok bushibaren tiptemtsü onoki temulung alemer" ta Lotha Students' Union President Lirhonthung E Kithan, Education & Statistical Secretary Nyanthung M Khuvung aser

General Secretary Chanpenhthung nungeri shidi nung ashi.

**Wokha district nung shishilembadak lapoktsü:**

Wokha district nung mapang telatet makai mokdangba ajanga Chamber of Commerce-i hopta shia anogotem lemsar shishilembadak lapoktsü metetdaktügo.

February 13, 2024 nungi tenzüka anepdang 8:00 ako nungi nikongdang 2:00 ako tashi Mongulbar, Brihostibar aser Honibar anogotem shishilembadak lapoktsü ta Wokha District Chamber of Commerce-i metetdaktü.

WDCC&I-i February 10, 2024 nü Wokha nung amenoka aliba Lotha kin teloktem aser Joint Action Committee on NH 2 two lane construction den senden ka amendang iba lemtet agi, ta President Vungathung Murry-i ashi.

Paisa essential commodities abenba garitemi WDCC&I office nungi Vehicle Permit/pass meshitsü metetdaktügo.

# Zunheboto nung ninang metsütsü training agütsü



Kitami yimdak February 10, 2024 nü ninang metsüba training agütsü dang tangokba noksa ka nung training agirtem, iba training ayongzüker aser shisalen sayurtem angur.

**Dimapur, Tsüklai/February 11 (TYO):** All India Co-ordinated Research Project on Honey bees and Pollinators, AICRP (HB&P), ICAR, School of Agricultural Sciences, NU, Medziphema ajanga February 10, 2024 nü Zunheboto District kübok Kitami yimtsüing nung "Scientific Beekeeping for Entrepreneurship Development cum Input Distribution" nung ajemdaker anogo ka training agüja liasü.

Iba training nung ninang metsüba mapang amshiba osettsüset indang onüktem ayimjema liasü, kong Apis cerana aser Stingless bees metsüba mapang scientific bee box aser danga osettsüset amshitsü indang jembia aser aluyimer tem dang Scientific bee boxes amshiba tajangzüik indanga shia liasü.

Bee biology, mojitzü agütsüba ninang ainba, tsüngkum-mongpu balala nung parnok anepaluba, ninang

indang tashidak, pests, queen rearing amala onüktem jangjangja lemsatepa liasü.

Maneni honeybees nungi osettsüset mesüra chiyongtsü balala yangluba, ninang mojitzü indang quality management, wax, pollen, bee venom, royal jelly, propolis amala indanga aluyimer dang sayua liasü.

Ninang ajanga süngjang-lijang tali adokdaksüba, nara aser süngdong-lidong tesem balala nung jakshidaktsüba nung yariba indanga angatetdakja liasü.

Iba training nung Pughoboto sub-division kübok Kitami aser anasa aliba yimtsüingtem nungi nisung 75 shi arua aden, kong Dr. Avinash Chauhan, Training Coordinator and Principal Investigator, AICRP, Honey bees and Pollinators menden liasü aser paisa tarur pela agizükba o jembia.

Pastor, Kitami Village Baptist Church ajanga sarasademer sentong tenzüik

aser iba sülen tesemdangertongti ama Head GB Kitami village ajanga tayongzüikba o jembia liasü.

Iba training nung shisalen sayur ya Dr. Otto S. Awomi, Asst. Professor, Living Bible College, Vihokhu; Dr. Kavi Sumi, Scientist, SAS, NU; Dr. Avinash Chauhan, PI, AICRP (HB&P), SAS, NU liasü aser Ngukho, Bee Professional, AICRP (HB&P), SAS, NU Medziphema ajanga ninang metsüba yimya balala sayua liasü.

Ninang metsürtem nungi 'Experience Remark' agütsüba den Kughakhu, VDB Secretary, Kitami Village ajanga melezpüng o jembia aser training agir ajak nem bee boxes lema agütsü.

Iba training ya ICAR (Indian Council of Agricultural Research), New Delhi kübok AICRP, Honey bees and Pollinators ajanga ayongzüka liasü.

# LFI nung Grade-XII atema graduation sentong ayongzüik



**Dimapur, Tsüklai/February 11 (TYO):** Livingstone Foundation International nung Grade-XII batch of 2023-24 atema Graduation sentong Honibarnü LFI Green Lawn nung ayongzüka liasü.

Iba batch nungi kaketshir 110 tashi kobi melie CBSE Board Final tatidang agütsütsü. Iba sentong nung tsürabortem, kinunger, alumni, temulunger, tejaoker, kaketshir tesayur aser staff tem dena liasü.

Iba sentong ya nikongdang 4:00 ako nung Rev. Fr. Joe Mariadhas, Director of Shalom Rehabilitation Centre ajanga sarasadema tenzüik aser founders and administrators of LFI, Arthur Edwards aser Nisheli Edwards nati temo milen tsüklokja liasü.

Sentong nung tajungshi o

jembidang LFI chairman, Dr. Anderw Ahoto Sema-i ashiba agi, taoba mapang azünger dang nungi tang Grade-XII nung azüngertem tia takaba lir.

Pai graduation batch dang school indang motto 'Learn to Serve' ama takum nung yimya tajungtem amshitsü ajungshi aser pei agitsü mebilemi lokti nem agütsütsü, ajak dang temeim sayutsü ayongzüka liasü.

LFI indang director, Ani Yephthomi-i tarur pela agizükba o jembidang, tanü kechiserna metetnüba aser angatetnüba ama inyaktetsü asoshi shisalak ya tongtipang ta LFI tamang aser nükla lir, ta ashi.

Tanü graduate asüba kaketshirtem ya LFI kibong indang 'heartbeats' lir, ta lai ashi aser pei jangraba wadang nung bendanga agütsür inyaktetsü

ayongzüka liasü.

Laisa parnok dang temelenshi bener arutsür ka-ka akumtsü, kati ka ajungmesotsü aser yaritsü ayongzüka liasü.

Graduate asürtem tenüng nung Head Boy, Henjoy Ham aser Head Girl, Anna Zimo nati jembia liasü.

Iba sentong nung Alumnus of LFI, Dr. Rhondemo Kikon ajanga jembiba screen nung sayua liasü.

Sentong nung LFI director ajanga graduates tem asoshi Pledge of Honour agia graduation certificates lema agütsü, LFI Alumnus aser kentener tejen Nikato Y. Tamang ajanga temeja ken aten, LFI juniors temia salem o lemsatepba video ka sayua liasü aser graduate asürtemia ken ka aten.

# Kiphire & Noklak nung entrepreneurship training agütsü

**Dimapur, Tsüklai/February 11 (TYO):** The Entrepreneurs Associates ajanga Science & Technology Intervention in North-East Region (STINER-TFC) den lungjemer Kiphire aser Noklak district tem nung "Entrepreneurship through Waste Management" training agüja liasü.

STINER-TFC professionals temi banana fiber agizükba aser vermicomposting yimyatem sayua agri-entrepreneurship temaba jenjangi ajungkettsü nükjidong nung iba training ya agüja liasü.

Iba dem külemi STINER team ajanga banana extraction machine tem agüja liasü.

Kiphire nung iba training ya Amahator yimdak February 10, 2024 nü agia liasü.

Iba training nung Bikram Ghimere, Project Assistant, STINER-TFC ajanga jembidang Ministry of Development of North-East Region ajanga 2019 küm STINER tenzüikba nükjidong lemsatepa liasü.

Region nung rongsen peria lir, saka senzüka yutsüba ajanga nüburtem tejakleni maor, anunghi entrepreneurship, talisa banana fiber extraction aser vermicomposting ajanga nüburtem rongsen lenmang tajungba akumtsü, ta Ghimere-ashi.

Iba training mapang banana fiber amshia handbags aser saucers amala yangluba sayua

liasü. Technical training session nunga pai vermin-composting process sayua liasü.

Sentong tatem Amahator Block nung aliba Farmers Producer Organisation (FPO) indang CEO, Hubilu Tunyi-i STINER team dang pelaba lemsatepa liasü.

Noklak nunga 'Entrepreneurship through Waste Management' training ya Noklak District nung aliba Farmer Producer Organizations (FPOs) asem asoshi ayongzüka liasü. Iba training ya the Entrepreneurs Associates (tEA) ajanga STINER-TFC den lungjemer Jungyam Fishery Farm, Noklak nung February 8, 2024 nü ayongzüka liasü.

Sentong tenzüka Kunio, FPO Board Member ajanga sarasadem aser Bikram Ghimre, PA STINER-TFC ajanga STINER-TFC indang rateta shia liasü.

Chubasashi, Mechanic STINER-TFC ajanga lokti dang Banana fiber extraction machine amshiba yimya sayua liasü.

Pa banana fiber ajanga osettsüset balala yanglua alibatem sayu aser market nung item oset ayokba aser ayoktsü lenmangtem lemsatepa liasü.

Paisa Cardamom dryer indanga rateta ashi aser mersü aser shi amala akongba nung amshiba yimyatem angazükdakja liasü.

# Assam Rifles temi sentong balala ayongzüik

**Dimapur, Tsüklai/February 11 (TYO):** Ghaspani nung February 10, 2024 nü Assam Rifles temi "A Day with Company Commander" ta sür sentong ka ayongzüka liasü, kong Hope Academy School, Dimapur nungi kaketshir 56 aser tesayur 10 arua shilem tajung agia liasü.

Iba sentong ya "Life through soldiers' eyes" omen nung ajemdaker ayongzüik, kong kaketshirtem anogo ka sepai taküm aser parnok anogoshi inyakba yimya balala angazüka liasü.

Iba mapang kaketshir temi sepaitem den külemi maparen balala inyaka linük asoshi takum bendanga agütsür nem akhum agüja nara yutsü, administrative stores aser hadir balala sayu,

dog show aser Pipe Band display liasü.

Kaketshirtem ajungmesoa Assam Rifles aser Indian Army ajanga yangluba video tem sayua liasü.

Meta talang nung Ayushman Bharat sentong tajungtiba nung nüburtem nem angatetdakja parnoka iba sentong nungi tajangzüik agidaktsütsü nükjidong nung Assam Rifles temi Peren District kübok Gaili Namdi yimdak February 9, 2024 nü Medical Camp ka ayongzüka liasü.

Iba camp mapang yimtsüing nung shilumanemba aser yirur alirtem anepalua liasü.

Tetsür, teintet rogo aser tanurtem densema iba camp nung nisung 150 shi dena teyari agia liasü.



Nagaland Collective ajanga Nagaland Olympic Association 2024 asoshi mejemba "We're Stars" ken tanü sayaogo. Iba ken video ya YouTube <https://youtu.be/pe6r5CH6Dyc?si=MC4XuLQoVQz-4SAf> nung repringtetsü.

# Lok Sabha election nung BJP-i menden 370 dak tema angutsü: PM Modi



February 11, 2024 nü Jhabua nung terenlok projects balala semzüksüba sentong nung Madhya Pradesh Chief Minister, Mohan Yadav-i Ato kilonser, Narendra Modi agizükdang tangokba noksa nung angur. Kasa noksa nung state Angh, Mangu Bhai Patel-a angur.

**Jhabua, February 11 (Agencies):** Amongnü Ato kilonser, Narendra Modi-i, taruba Lok Sabha election nung BJP-i menden 370 dak tema angutsü, ta ashi.

Paisa, Parliament nung opposition lenirtemia BJP-i aniba NDA teloktepi menden 400 dak tema angutsü imlar, ta metetdaksü.

Amongnü Madhya Pradesh kübok Jhabua nung Ato kilonseri sen crore 7,550 dak tema indang terenlok project balala tenzükja liasü.

Iba sentong nung jembidang Modi-i tribal nisungtem dang taruba election nungbo polling booth shia nung taoba mapang dang nungi vote 370 bosa tali agüjang, ta mepishi.

Modi-i, pai Jhabua semdangba ya taruba Lok Sabha election atema nüboyimtsü asoshi aruba masü saka 'kilor' ka ama nüburtem dang tawa assembly election nung yariba atema tepela lemsateptsü atema aru, ta metetdaksü.

Tawa Madhya Pradesh,

Rajasthan aser Chhattisgarh assembly elections nung BJP-i takok tulu ngua liasü.

Modi-i, "Madhya Pradesh nung gol ana aketba (Centre aser state naprongla nung sorkar) ozü sorkari anasü kera-a inyakdar," ta metetdaksü.

Ato kilonser-isa, "Congress party-i mapang talangka sensakertem, aluyimertem aser tribal nisungtem sendok; election mapang nung ang Congress-i yimtsüngtem, sensakertem aser aluyimertem bilemteter," ta ashi.

# February 13 nü aluyimertemi Delhi nung longkak aittsü

**New Delhi, February 11 (Agencies):** February 13 nü 'Delhi Chalo' march agitsü atema aluyimertem union 200-i ayongzükä lir, ta Delhi police intelligence report ajanga metetdaksü.

Aluyimertem 15,000 nungi 20,000 tashi tractor 2,000-2,500 shi nung mener Delhi tonga arutsüa akok, ta kasa osang ajanga metetdaksü.

Aluyimertem unions-i iba sentong atema 40 ben tashi renemshio; terenemshibaji Haryana nung 10 ben aser Punjab nung 30 ben agia liasü, ta parnokisa metetdaksü.

Tractors dak alia aluyimertem aika gari, bike, Metro, train aser bus nung Delhi tonga arutsüa akok, ta

parnoki metetdaksü.

Punjab, Haryana, Rajasthan, Uttar Pradesh, Kerala aser Karnataka state tem nungi aluyimertem meyrjang aikati longkak aitba sentong nungji shilem agitsü. Iba sentong atema aluyimertem unions-i senden 100 ben dak tali menogo.

Longkak aiterem rongnung tensa raksatsütsüpurtem-a densema alitsüa akok, anungji tensa aziöktsü atema renema alitsüa, ta parnoki metetdaksü.

Aluyimertem kar Ato kilonser Narendra Modi'er kima; kar Union Home Minister Amit Shah, Union Agriculture Minister Arjun Munda aser BJP lenirtem kima longkak aitba sülen Delhi telungi aitsüa akok,

ta intelligence osang ajangasa metetdaksü.

Social media nung olulu prokba nokdangtsü aser tensa meraksatsü atema Delhi arrtsülen mita alitsü kanga nüngdak, iba denji külemi Delhi telung nung security atsü tashi itta atsütsüla, ta parnokisa metetdaksü.

Aluyimertemi sorkar dang minimum support price (MSP) akhanger, Lakhimpur Kheri nung aluyimertem menüngsetba ken o nung aibelenertem nem temerenshi agüjang ta akhanger, aluyimertem anema benoka aliba ken o ajak agentsü akhanger aser arrshi küm 60 ser temapur aluyimertem nem ita shia pension 10,000 agüjang ta akhanger.



New Delhi, February 11, 2024: Amongnü Rashtrapati Bhavan nung Army Guard Battalion mapa melentepba sentong nung sepaitemi linük Tir, Droupadi Murmu agizükdang tangokba noksa nung angur. Sikh Regiment 6th Battalion kümsük abensaba sülen 5th Gorkha Rifles 1st Battalion nem mapa melenzüksüogo.

# Enforcement Directorate-i BJP lenirtem anemabo mita maor: Sharad Pawar

**Pune, Tsüklai/February 11 (Agencies):** Amongnü NCP tongti, Sharad Pawar-i, Enforcement Directorate (ED)-i BJP lenirtem anemabo mita maor, kechiyong iba party-i sorkar tashi bena lir, ta metetdaksü.

Tawa Election Commission-i Sharad Pawar'er aianu chir, Ajit Pawar-i aniba telokji chichiba NCP lir ta agizükä party election temaitsü 'Clock' agütsüba dak sendakba nung Sharad Pawar-i, iba ama tensa ya linük nung kodanga matalokdang, aser nüburtemi iba ama telemtebaji pumasemtsü, ta metetdaksü.

Yaküm July ita nung Ajit Pawar-i NCP MLA tem teimbaka anir oa Eknath Shinde-i aniba sorkar nung aden. EC-i Sharad Pawar-i aniba telok nem 'Nationalist Congress Party-Sharadchandra Pawar' nungja agütsü.

Amongnü Pune nung party sentong ka nung jembidang Sharad Pawar-i, kodang nisung kari BJP anema jembidir parnok anema sorkari tashi tim mesüi amshir, ta ashi.

"ED-i linük tesem ajaklen mita aoer aser 2005 küm nungi

2023 küm tashi nung parnoki ken o 6,000 dak tema benokogo. Ajisüaka ken otemji shilem 85 bo opposition nungi lenirtem anema benokba lir," ta pai metetdaksü.

"BJP-i sorkar tashi anguba mapang nungi (2014 küm nungi) ED-i iba party nungi lenir ka anema danga meinyak. Talisa BJP-i sorkar akümba sülen BJP lenirtem anema bushisüngdangba ajak anenadok," ta pai metetdaksü.

Tesülen osangbenertem den jembidang Pawar-i, mezüing election nung ni 'alu alaba' temaitsü nung toktep, ajisüaka tanübo temaitsüji masü saka tangatetbaji tongtibangba, ta ashi.

"Election Commission-i agiba telemtebaji taoksatsüka lir. Iba party tenteterem aser party yangerteterem ket nungi party rakzükogo. Onok meyong party ka tangar nem agütsüogo, linük nung yamai kodanga matalokdang. Nüburtemi iba telemtebaji (EC) kodanga pumasemtsü, ta ni bilemer. Hombarnü onok senden ka mena nungja tasenba aser election temaitsü atema jembitsü," ta paisa metetdaksü.



February 11, 2024 nü New Delhi nung aliba Connaught Place kima talidak malir tetsür ka aser lar jabaso na mena aliba noksa nung angur.

# Uttarakhand state sorkari Centre dang sepai tali meshisemer

**Haldwani, February 11 (Agencies):** Uttarakhand kübok Haldwani nung ozüing alema yangluba mosque ka bendoktsüba sülen February 8 nü lendong tulu ataloka liasü; tang tashi tensa mejungi lia Uttarakhand sorkari Centre dang central sepaitem tali yoksemang, ta mepishiogo.

State Chief Secretary, Radha Raturi-i Union Home Ministry dang Central Paramilitary Forces nungi company pezü tali yoksemang, ta mepishiogo.

Haldwani kübok Banbhoolpura temeket nungbo curfew ozüing agienogo aser tang Haldwani nung security sepai 1,100 shi lir.

Social media nung olulu prokba nokdangtsü atema tang tashi Banbhoolpura nung internet services ajak shibangja lir. Brihostibarnü rara nung nisung trok asü aser nisung 60 dak tema yirua liasü.

Ano külen tanga osang ka nung, Uttarakhand police-i Haldwani nung rara adoktsüsa asalentong yanglur tongti, Abdul Malik, Delhi nung lia puogo.

Security agency temi Abdul Malik dang asüngdangyadar; NSA kübok pa anema ken o benoktsüa akok, ta osang angazüker.

Sorkar meyong li nung Abdul-i ozüing alema mosque asü, ta tai tonglokja lir.

Uttarakhand Police-i CCTV noksatem repranga rara nung shilem agirtem jangjatsü meranger, aser tang tashi nung tetsür densema nisung 75 puogo.

Tang pua alirtem rongnungji Samajwadi Party lenir ka adianu-a densema lir.

Haldwani kübok Banbhoolpura nung tensa aziöktsü atema super zone 5 küma lemsar mita reprangtsü atema magistrates tenet nem mapa lemezükja lir.



## TIR YIMYIM YIMOBILEM (EDITORIAL)

DIMAPUR TENTONÜ, FEBRUARY (TSÜKLAI) 12, 2024

### DC office dena shibangtsüba ya koda ?

**K**ohima aser Mokochung na tsungda Wokha district ajanga aoba National Highway-2 nung two lane lenmang yanglutsü mapa agizüka yur shitak meinyakba agi Lotha nung lorkti tentetemi lenmang mokdangba dang masü saka Wokha nung Deputy Commissioner office dena shibanga yutsüba mapaji zübazübaa bilema agitsüba mapa ka masü saka Nagaland tebilemsüji iba jagi sayur. Atangji, Wokha nung nübertemi DC office ji dang masü saka SDO (National Highway) office dena shibanga yuja lir. Tetezü, Wokha district nungbo government mali amai kumogo. Iba tensa tiaji kodang bilemdangdir, itemji nübertem asoshi terenlok mapa inyaksürtemi mapa shitak meinyaksüba ajanga atalokba timtemtem lir. Atangji, NH 2 nung gari lenmang 2 lane kuma yangluba maparen nungji nübertemia pei kiojen aser osettsüset maitsüba aser magienba timtema agütsür alitsüa akok. Ajisüaka, State Highway-a masü National Highway ka yanglutsüba maparen nungbo government tashi amshia inyaka aotsü koka lir ser nung moutetba tetezüji government tashi amshia inyaksü pur district administration aser National Highway nung ketdangsertem dakji indangindanga tim teinyaksü inyaka aotsüa tashi mali kumogo ta angatetter. Aji 'power'bo lir ser nung 'authority' mamshitetba mapa ka asütsü. Aji oda, 'power' nung alirtemi 'authority' mamshitetba tetezüji pei dak tai keta lir, anungji nüktapangtatsürla dak long agi mountet amato kumadoker. Tang Wokha district nung nübertemi government dang jashiba kuliji, parnok lushi nung NH 2 renema meiyaki anenadokba aser lenmang yangludang kiojen aser süngdonglidong raksaba melen temenok senotsü agütsütsü aliba shitak magütsüi ayuba mapatem lir. Ashiko, iba jagi government nung alirtemia Lotha nungertem denji lenmangji shitak yanglua yakta renemtettsüsa ken o tajung ka mejembitetter asütsüa akok. Iba jagi Lotha nungertemi district administration dang alimenok (damage compensation) kar nem agütsür anungba aliba sen indangji asüngdang asütsüa akok. Atangji, Nagaland nung lenmang yanglusaba aser mapa inyaketba aser inyaktor anenba mapatem ya Wokha district nung dang masü saka district ajak nung lir. Item jagi Nagaland ya terenlok mapatem inyaka aotsüba nung tejakleni talangka orr asütsüba agi moutet soita ayur. Nagaland ya tangar bendanger kin China anasa Myanmar ama den kidanger asüba agi India asoshi kanga tongtibang state ka lir, iba jagi Nagaland ajanga aoba lenmang ajak National Highway kumdaktsüogo. Iba jagi Nagaland kanga ajanzüktsüba ser nung asen lima nungbo National Highway yangluba yimya nung teyanglurtemia meyanglur, kechiyong item mapaji shitak repringa inyakdaktsütsüsa administration aser department nisungtem dak 'power' dang ashi 'moral authority' mali akümba repringtetter. Ibayongji, Wokha nung DC ba dak power lir ser nung nübertem nem pa office shibangdaktsüba asenoki angur. Kasaji, Kohima nung alirtem dak aliba power agia DC office-ji meküzmüktetter. Aji oda, DC-iang nübertem azüoktsü melen nübertemiang DC office shibanga yutsüra Nagaland nung administration dak aketba power aser authority otsüji yangji atemer. Atangji, tanga district-tem nunga nübertemi Wokha nung nung inyakba amaji inyaksü menua mali, kechiyong National Highway inyakba ajanga nübertem tang ama takong mapang auyi agi gari toudak nunga kecha mangu timtemdaktsür aser May ita nungi tsunglu aru tenzükdangbo lenmang tesem aika nübertem oli aruli mesütet takoksa jenti ajurutsü. Aji National Highway lenmang inyakba yimya masü. National Highway inyakba mapang auyi mapungtsüsa lenmang nung tzü araktsüla aser nisungtem oli aruli mesenzütetsüsa lenmang nung lishi teploka malitsüla aser motzua atsünga mayutsüla. Iba amaji majurutsü aser nübertem nem timtem magütsütsü atema National Highway nuynungbo mapa metenzükdangyongi nübertem jajatsüba lenmang tamasa yanglua toktsür. Iba senji state government sen a masü aser mapa inyaker contractor meyonga masü, ibaji center government nungi nisungtem ayongayonga senzütsü atema dang masü saka alima dena topur jungdakja National Highway yanglutsü yokba sen lir. Power amshirtemi item senji junga mamshitetba agi authority mamshitet government office dena shibangdaktsür.

## OLEMSABANG

### ANEMAALITSÜ ATEMA ANEPALUTSÜYIM KAR

Dr. Tali Longkumer  
Consultant Gastro Dimapur

(Yashi adok nungi...)

#### 5) Tashitak keta alirtem atema:-

Aiben asenok nisung aika tashitak palala agi tonger liaka, aiben regular check up aser follow up maoer. Item tashitak aketer atema balaka regular check up ji kanga tongtipang. Asenok chiyongtsü tali mazüoki achiba (overeating) ajanga-Obesity, (overweight), Diabetes, Blood pressure, Heart attack, Stroke adokba jembiogo. Iba dak alaka yi ajemba aser mokhu achiba ajanga cancer, liver cirrhoses, heart attack, stroke adokba nguogo.

Item tashitak rongnung tanu asen lima nung tongtipang tashitaktem ya high blood pressure, diabetes, stroke, heart attack aser cancer lir. Asenoki item tashitaktem ya khen lemsatepti.

**(a) Blood pressure:-** Blood pressure tashitak ya aiben familial-azü nungi aruba-a asütsü akok. Saka teimbaka taküm libaliro (lifestyle) ajanga adoka lir. Chiyongtsü nung mazüoktet-metsü (salt), shi (red meat) yi ajemba (alcoholism) mokhu achiba, (smoking), exercise magiba, (lack of exercise) mental and work stress ajanga lir. Na kodang blood pressure agi shiranga aser ibaji mozü regular machi aser junga control mesui yudir, item timtem ya adoktsü akok :-

- (1) Heart attack
- (2) Stroke
- (3) Heart failure
- (4) Kidney failure
- (5) Blindness
- (6) Aneurysm.

Na pressure tashitak lira, arishi tepiyong mozü achitsüla aser BP regular check up asütsüla.

**(b) Diabetes:-** Shia aruba amaji diabetes ya-a libaliro (lifestyle) tashitak ka lir.

Aiben iba ya familial-azü nungi arur. Saka timbaka asenok mekumdangi aliba ajanga adoker. Item rongnung chiyongtsü mazüokba (gluttony), yi ajemba, exercise magitetba taküm, aser mental stress tem alitsü. Na khen diabetes putetra teti mozü regular, arishi tepiyong achitsüla. Blood sugar junga control mesütetba ajanga item tashitak agi atongtsü temela lir.

- Heart attack
- Kidney failure
- Blindness
- Stroke.
- Nerve paralysis.

**(c) Stroke:-** Blood pressure aser blood sugar junga control mesütetba ajanga stroke agi aiben atonger. Aiben temang nung temo (fats) tali aliba ajanga stroke agi atongtsü akok. Saka yi ajemba aser mokhu achirtem stroke agi tali pulua atonger. Stroke agi khen tongra, tanaben atongtsü ano chance kanga lir. Anungji mozü arishi tepiyong achitsüla.

**(d) Heart attack:-** Temulungjang nung azü mejajaba ajanga heart attack ya ataloker. Iba tashitak ya aiben mokhu achirtem aser diabetes aser blood pressure alir dak atonger. Temang nung cholesterol (fats) tali alirtem atongtsü temela. Aiben mental stress ajanga heart attack adoktsür. Na khen heart attack süra tanaben atongtsü ana nung lir. Arishi tepiyong mozü chia regular check up asütsüla

**(e) Cancer :-** Cancer tashitakya asen Naga nung kanga pulua adoker. Asenok libaliro, chiyongtsü aser mopung, tzü mesüra infection ajanga adoker. Tatishitsü agi shi aser ango takong (dry meat) achiba ajanga stomach cancer tali adokdaktsür. Hepatits (B) infection ajanga liver cancer adoker. Virus infection ajanga Cervix (womb) cancer adokdaktsür. Yi ajemba aser mokhu achiba ajanga, Liver cancer, throat cancer aser Lung cancer adokba kuli tejangja lir. Temo (fats) tali achiba ajanga colon cancer aser pancreas cancer adokba kuli lir. Tobacco/pan ajanga mouth cancer adoker.

Yamaji, asenok libaliro yimya aser chiyongtsü ajanga asenok kechi tashitak agi atongtsüar aji lemteter.

**"Our food habits and lifestyle determine our destiny, what kind of disease we will suffer from".**

Anungji asenok chiyongtsü, libaliro, sali mokhu, yi azüoktsüla aser keta aliba tashitaktem regular sua azüokalira tashidak aika nungi jempua aser arishi talang alitsü.

Iba dakji alaka temulong pela-a alitsü kanga tongtipang. Asenok sasa asen mental stress azüoka aser temulung anisungzüka alitsü merangtsüla.

**(Iba ocet ya Ao Baptist Arogo Padum Pukhuri-i adokba Ranglok Kaket July 2021 Adok nungi agitetta adokshir)**

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Assam nung sayutsüngiba atema America nunger ana apu



John Matthew Bone aser Michael James Flinchum na noksa nung angur.

**February 04, 2024:** Tan ita tetenzüklen Assam Police-i America nunger anati visa temzüng alema inyakogo, ta aija apuba sülen senchi achi.

America nunger ana- John Matthew Bone aser Michael James Flinchum nati tourist visa nung India semdanga liasü, ajisüaka tenati Khristan yimsü ajungketja sayutsüngiba ajanga visa temzüng alema inyakogo, ta police-i aitsü.

Tezpur area nung alirtemi Sonitpur District police dang, Baptist Christian Hospital ka nung America nunger anati Khristan yimsü indang sayutsüngir, ta metetdaksüba sülen police iba tesem jagi arua tena apu aser Kacharigaon police station nung tena anema ken o ka benok.

Arogo organizations-i ayongzükba sentong ka nung America nunger ana jagi shilem agibaji tourist visa temzüng alema lir, ta police-i metetdaksü.

Osangbener den jembidang Sonitpur Superintendent of Police, Susanta Biswa Sarma-i, temzüng alema sayutsüngiba atema America nunger ana dang senchi dollar sen noklang pongungu- (\$ 500) chiogo, ta metetdaksü.

Ministry of External Affairs nem-a iba osangji metetdaksüoggo aser America

nunger ana dangji joko yimsü dang sendakba sentongtem nung shilem magitsü tuyuogo.

SP Susanta Biswa Sarma-i, "Yakünü onoki tena apu. US nungi raliwalir ana jagi sayutsüngiba nung shilem agi, anungji Visa temzüng nung aliba ama tenaprongla dang senchi dollar sen noklang pongungu chiogo," ta metetdaksü.

2022 küm October ita nunga Assam nung Germany nunger tenet aser aser Sweden nunger aseme missionary mapatem inyakba ajanga visa temzüng alema inyakogo, ta aija pua liasü.

Mapang shia bendangertem tourist visas ajanga Assam semdangba sülen tribals aliba tesemtem aser süngo-lu nung inyakertem dang sayutsüngibaji Hindu teloktemi mita repranger.

Assam nung America nunger ana apuba dak sendakba nung osangbenertem den jembidang Assam Christian Forum nung otongdar, Allen Brooks-i, "John Matthew Boone aser Michael James Flinchum nati yimsü meyipdaksüba nung shilem agiogo, ta tena nem tai tongloksübjaji tiyazü; iba nungji ochi mali," ta metetdaksü.

Allen Brooks-isa, "Iba sentongji sarasadem sentong

masü saka office building tasen semzükba sentong ka liasü. America nunger anaji ainertem ama jaoka liasü aser chiyungtsü lia sarasadembo agiogo," ta metetdaksü.

"Ibaji yimsü meyipdaksüba sentong asütsüa akok ta state administration-i bilem südi," ta paisa ashi.

1626 küm Khristan missionary tem northeast India tonga aru aser 1819 küm British nunger yimsüsürtemi northeast region nung yimjung alitsü atema Khristan missionary tem mapa ajungshia liasü. Tangbo iba region nung state tenet lir aser state asem- - Nagaland, Mizoram aser Meghalaya nungbo nütsüng teimbaka Khristantem lir. Tanüngba state pezüji Assam, Manipur, Tripura aser Arunachal Pradesh state tem lir.

Allen Brooks-i, "Missionary temi shisaliok aser healthcare facilities ajanga yimsü balala amangertem ajak tenzüka arur," ta ashi.

"Khristantemi lapokba shisaliok rejutem nung kaketshirtem Khristan yimsü dangi meyipdaksüra missionary school tem nung azüngertem- taoba mapang Assam Chief Minister, Sarbananda Sonowal densema lenirtem aika Khristan kümer lila," ta paisa shisem.

# Pakistan nung election mapang Khristantemi kasa temeden akhang

**February 11, 2024:** Pakistan linük nung general election agitsü jakdang Khristantemi linük nung Khristantem nem kasa temeden agüjang, ta takhangba agüja liasü.

Pakistan nung tang tashi Khristantembo 'second class' sensotem ama züngshir, aser ibaji sorkar temaba jenjang nungi lir ta bilemer.

Pakistan linük nüchiso anguba sülen joko küm 80 jungnüa arudang Pakistan nung nütsüng kanga ajema aliba Khristantemi tang tashi parnoka kasa züngshitsüla ta akhanger, ta International Christian Concern (ICC)-i metetdaksü.

Election atongtsü mapang anasa Pakistan People's Party (PPP) nungi Bilawal Bhutto Zardari aser PML (N) nungi Maryam Nawaz napronglai Lahore nung Khristan nütsüng aika aliba kiyong ana- Bahar Colony aser Youhnabad na semdanga Khristantem ajurua liasü. Lenirtem jagi Khristantem dang parnoki election nung takok ngura Khristantem nem kasa temeden agütsütsü, ta nangzüka liasü. Bilawal Bhutto Zardari-i Khristantem dang kasa temeden agütsütsü, ta nangzükyonga küm shia Khristantem kangshia Islam

yimsü dangi meyipdaksüba tatalokba teimtibaji pa indang region nung liasü. Ano külen yaküm longkak aiter Muslim nungertemi Jaranwala nung Tenla ki aika rongdokja Khristantem amakba sülen PML(N) party nungibo lenir kati danga takoksa angur Khristantem mesemdangi liasü.

Pakistan kübok Punjab province nung Khristan nütsüng million 17 shi lir, anungji election shia yimtenren lenirtemi Khristantem dang election nung takok ngura kasa temeden agütsütsü, ta nangzüker saka nangzükba ama meinyaker.

# ANOGO ABEN TSÜNGREM DEN

## Akanga atemba

Shibai tamajung pur tasa nung mejajar, aser temenen pur leman nung menokdaker aser sensamasatsür menden nung mamener, iba nisungji temoatsüba.

Saka Kibuba ozüng nung Pa jangra atemer aser Pa ozüng nung mangli sangwali pai shisadanger. Aser ayongküm nung atemba süngdong, kobai pei tsüngküm pei tejang atanger, iba ama pa lir. Pa toa mazülar aser pai kechisa inyakdir azük arur. T.Ken 1:1-3.

Tsüngrem ochiba indang ajak meteta ne taküm tepiyong alitsü aser ibaji kodang majangshi-i alitsü tamakoktsü. Tsüngrem ochiba metetba kisüng jagi na ne taküm iba nung shilem ka akümer. Yangi tongtipang tasüngdangba kar Tsüngrem O jagi nai kechi inyaker? Kari Tsüngrem O jagi kecha balaka taküm nung mapa meinyaker ta bilema memeshiba kübok alir. Nai Tsüngrem memeteter nungi shisatsü agira, Tsüngrem O-i ne nem kechi ozüng agütsür iba nungi na pilaa aoba nai angutsü. Nai asaa ne tembar asütsü temenen pur bushira, parnoki na Tsüngrem leman nungi sensamasatsür leman nung amentsü bushira na sensamasar nisung ka akümtsü.

Temeshi nisungi tangar tebilemba nung tasü maiter saka Tsüngrem O nung Pai tema nung Laishiba metetba temulung masür saka anepdang aonung shiba iba nung shisadangba nungi kechi ajangshir iba nung temulung asür. Pa ayongküm nung atemba süngdong ama akang akanga notaka alitsü. Süngdongji junga mesür aser süngjang tanang tajung tangtsür aser tuo mazülar, kümyang kümyanga alitsü. Nisungtem talang nungi iba akhüm nung talang nungi iba akhüm nung amentsü aser iba nungi achitsü arutsü.

Nai Tsüngrem O ne taküm nung amshitsü Tsüngrem dang melara, tangar na nungi angazüktsü. Tsüngrem temeshiba na tali aindang, na tali tashi taitba akümtsü. Kari amajok nung parnok dang shisatsü o ashitsübur, saka temeshi nisung yamaji masü. Maneni nisung teloki na bushitsü aser ne takümü temoatsü ka ta parnoki metet.

# China nung Khristan yimsü toktsütsü tanurtem nem nangzükdaksü

**February 11, 2024:** Chinese New Year mapang nung Khristantem anema inyakba atema yimsü temeden atema inyakertemi tebilemtsü akaba lemsatepogo.

China nunger Küm Tasen (February 10, 2024) mapang nung school tanurtem dang nenok Khristan asü?, ta asüngdang aser 'au' ta langzürtem dang Khristan yimsü tokjang ta shia tenangzükba agidaksü.

Voice of the Martyrs Canada den jembidang ChinaAid tentetsang aser Tir, Bob Fu-i, "Tanurtem nem Khristan yimsü sendokdaksüba maparen nungji tsüraburtem aser tetsü-tebou nungertemi amalitep mesüra parnok mapa nungi jendoktsüa akok. Tetsü-tebou nungertemi public health & welfare nungi teyari mangutsü aser tsüraburtem mapa nungi jendoktsü," ta metetdaksü.

Bob Fu-i, kibong ka nung tetsü kati lar chinur pongu dang ken ozülu, ongko aser tamangba yimsü indang tesayuba agütsüba mapang nung police-i la apu, ta metetdaksü.

UK nung amenoka aliba Khristan melungtet telok- - Release International-i 2024 Persecution Trends report nung China linük-a CPC (country of particular concern) list nung züngokogo.

Release International nungi Andrew Boyd-i, "China nung CCTV camera aika lir aser itemji ajanga Khristantem inyaksangshi mita repranger. CCTV camera million 200 shi lir. Sorkari melaba Tenla kidang sabang nung aser tesem ajak nung tejak ajanga maittsü metettsü camera yuja lir. Ibaji ajanga sorkari Arogo züngsemtem inyaksangshi ajak mita repranger," ta metetdaksü.

"Ner tanurtem arrshi küm 18 ser tekübok süra Tenla kidangi anir maotsüla. Tanurtem Tenla kidangi aotsü memelar," ta pai ashi.

"Nai chichiba nü tamang beshinüra nai underground Arogo ka nung adentsüla, kechiyong item Tenla kitem nungbo CCTV camera mali. Ajisüaka tai makatsü kaji-underground Arogotemji ozüngi memelar," ta paisa metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Shitokshira

(adv) kechiserna tzu agi meruka inyakba (washing)

\* Kidang shitokshira mapa nung tzu kanga agir.

Shitsü

(n) nashi mesukba arem shiruru (stag)

\* Shitsü ya lungren nung senzür.

OLONG PAITEP # 6695

Grid for OLONG PAITEP # 6695 with numbers 1-17 in various positions.

TIPIEN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amëna - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 6694 TELANGZÜBA

TIPIEN :

- 1. Tesangra, 5. Mungo,
7. Kisen, 8. Salem, 12. Semki,
14. Kilem, 15. Kensü,
16. Sangpang.

LANGTSÜNGLEN :

- 1. Temesen, 2. Raksa,
3. Aon, 4. Aso, 6. Nile,
9. Alizüng, 10. Omen,
11. Lemta, 13. Ola, 14. Kin.

NAI-A YA METETTER MA



Puducherry nung ketdangsürtemi cotton candy nung toxic chemical putetba agi mayoktsü tenokdangba agütsüogo. Puducherry Lieutenant Governor Tamilisai Soundararajan-i nübortem dang cotton candy malitsü kechiyong iba nung chemicals aliba putetogo ta osang metetdaksü. Cotton candy nung 'Rhodamine-B' ta ajaba toxic substance aliba putetogo ta Puducherry Lieutenant Governor-isa metetdaksü.

National Institutes of Health (NIH.gov) ajanga ashiba agi Rhodamine B dang RhB ta ajar aser iba chemical compound ya dye ama amshir. RhB ya chiyungtsü den meyokteper achiba ajanga cells aser tissues nung timtem agütsür aser mapang talangka RhB achiba ajanga temesen mapa meinyaki akümer mesüra cancer adoker.

Thoubal aser Churachandpur nung prangpong-injang aika ngutet



Imphal, February 11, 2024 (Agencies): Assam Rifles aser Manipur Police külemi mita aodang prangpong-injang aika ngutetogo.

Tesüiba ghonda 24 tsüngda Thoubal aser Churachandpur district tem nung parnoki 7.65 mm Pistol ka, revolver ka, single barrel rifle ka aser grenades 5 angu.

Osang tejangja ka angazükba sülen Thoubal district kübok Pechi nung mita ao.

Iba tesem nung mortar shell, HE-36 Hand Grenade, Tear Smoke Grenade, Tear Smoke Shell, Tear Smoke Shell Soft Nose (SR), 38 mm Cartridge with Rubber, Country made Mortar Shell, 9mm CMG with

two Magazine, 7.65 mm Pistol Browning's Patent with one magazine, Revolver (Country Made), Air Gun aser HTRF Walkie Talkie ngutet.

Churachandpur district nunga parnoki mita aodang Tear Gas Gun, Country-made 9mm Pistol along with magazine, SBBL Guns aser Improvised Mortar (Pumpi Gun) ngutet.

Manipur tsürtemi Assembly session jelia agitsü akhanger

Imphal, February 11, 2024 (Agencies): Manipur nung tetsürtemi February 28 nungi Manipur Legislative Assembly session agitsü sentong renemba aitsü aser anogo asem jelia agitsü takhangba agütsüogo.

"Kuki telungpurtem aser sorkartem tsüngda Suspension of Operation agreement tembangtsü anogo ka lia Manipur sorkari 12 buba Manipur Legislative Assembly indang pungububa session tenzüksü lemtetbaji tesasatsüka lir" ta Ima gi Meira convenor Thokchom Sujata-isa.

Nübortemi aiben Manipur Legislative Assembly session

jazüka tang ajurua aliba ken o lemteptsü aser telemtetba ka agitsü takhangba agüja arur. Yaküm August ita Manipur Legislative Assembly session minute 15 shi dang agi aser iba sülen session ka danga magi saka mepetmesü adoker ita 9 ajunger, ta Sujata-isa ashi.

Tang agitsü aliba session ya public atema masü saka financial year tenüng nung dang agir ta lai ashi.

"Nübortemi Kuki telungpurtem aser sorkartem tsüngda SoO agientsü takhangba agüja arur. SoO kümsük February 29 nü tembangtsü saka state sorkari

February 28 nungi assembly session tenzüksü jateper. Iba ajanga SoO agientsüba onük melemsatettsü" ta Sujata-isa metetdaksü.

State sorkari lateta aliba anogo nungi anogo asem jelia session tenzüksüla. Tang state nung tensa mejungi aliba mapang financial year nung dang temulung magütsütsüla. Sorkari assembly sabang nung tang tendak indang jembitsüla, ta laisa ashi.

Prime Minister Narendra Modi-i tawa Assam semdangdang Manipur-i maruba atema ashishiteper ta Ima gi Meira convenor Thokchom Sujata-isa ashi.

Baghjan nung nisung 2 ket nung prangpong-injang apu

Guwahati, February 11, 2024 (Agencies): Tinsukia district nung Indian Army aser Assam police külemi mita aodang prangpong-injang aika ngutetogo.

Osang tejangja ka

angazükba sülen February 11 nü Baghjan nung mita aodang Brajnath Panicka (42) aser Niranta Baruah (46) na apu.

Tena ket nung pistol aser injang aika ngutetogo. Tenati prangpong-injang shibelen,

rakzükraktem aser drugs shibelen ta Army & Police-i metetdaksü.

Doom Dooma police station nung tena dang asüngdangya südar ta iba osang zülu tashi nung angazükogo.



Deobarnü Naharlagun nung session 2024-27 atema Donyi Polo Khumko Nyedar Namlo ketdangpur tasen tezüngzüktep agiba sülen tangokba noksa angur. Nyedar Namlo ya Donyi Polo tamangba yimsü amangba lisopurtem külemdak lir. Indigenous Affairs Minister Taba Tedir-i Nyedar Namlo building tasen yanglutsü atema par department nungi Rs 1.75 crores lemszüksü. Iba sentong nung Advisor Dr Nabam Tata aser Reyang Yerkum Pwglang Vice Chairman Prof. Hui Tag na tetushi tejaokertem ama aden.

# Imran Khan'er PTI-i yariba independent candidate temi menden timba ajangtet



PTI bhukumer tem Pakistan nung longkak aitba noksa nung angur. Deobarnü Pakistan indang election commission ajanga sangdongba parliamentary elections osang nung taoba ato kilomser Imran Khan den sendaktepa aliba independent candidate temi menden timba nung takok angu.

**Islamabad, Tsüklai/February 11 (Agencies):** Deobarnü Pakistan indang election commission ajanga February 8 general elections indang osang sangdonggogo, kong tepuokdak yua alisang taoba ato kilonser Imran Khan'er party-i yariba independent candidate temi menden 101 ngua menden shilem tuluba nung takok angu. Election nung tim masüba mapa inyak ta Pakistan Tehreek-i-Insaf (PTI) workers temi linük tesem ajungalen longkak aitba mapang iba osang ya arur. Menden 265 nung toktepba nungi menden 264 indang osang Election Commission of Pakistan (ECP) ajanga sangdong.

Ashikülak mapa inyak ta ashishitepba ajanga Punjab province kübok Khushab nung alina NA 88 indang result ECP-i soita lir aser metokmeperi bentetba sülen sangdongtsü. Candidate ka asüba sülen menden ka atema election thinena lir.

Imran Khan'er PTI teloki yariba independent candidate temi menden 101 nung takok

angu, iba sülen Nawaz Sharif'er Pakistan Muslim League-Nawaz (PML-N) yagi menden 75 nung takok angu, koba technical tsütsü Parliament nung single largest party lir.

Bilawal Zardari Bhutto'er Pakistan Peoples Party yagi menden 54 ngutet aser Karachi nung amenoka aliba Muttahida Qaumi Movement Pakistan (MQM-P) ajanga menden 17 nung takok angur. Parnok ya Urdu oshi jembirtem lir aser India nungi partition mapang arurtem lir.

Danga party tila temi tanünga menden 12 nung takok angu. Menden 265 atema election agiba nungi sorkar ka kumtetsü asoshi party kati menden 133 nung takok angutsüla. National Assembly nung menden 336 lir aser simple majority asoshi menden 169 nungdaker, kong tetsür aser minorities indang menden wazüka ayuba dena lir, koba khen lir sangdongtsü.

Punjab, Sindh aser Khyber-Pakhtunkhwa provincial assemblies indang osang ajunga sangdonggogo, saka Balochistan

assembly nung constituency asem indang ano mesangdongi lir.

Punjab nung menden 296 atema toktepba nung independent candidate temi menden 138 angu aser PML-N ajanga menden 137 aser tanünga party temi menden 21 ngua liasü.

Sindh nung menden 130 atema toktepba nungi menden 129 indang osang sangdonggogo aser ochimashi mapa inyakba mechi constituency ka nung election tanaben agishitsü ECP ajanga totuyuba agütsü.

Khyber-Pakhtunkhwa nung menden 113 atema election agiba nung menden 112 atema sangdonggogo aser menden ka indang soita lir.

Azüdokshi agi sünger agiba Pakistan elections nungya Imran Khan'er telok independent candidates ama toktep, kechiaser parnoki electoral laws sülen manidakba yong par party indang electoral symbol mamshidaktsü. Tenokdangba agüjaka aser Khan ya ken o balala nung aija tepuokdak yua liaka nisung million aikati pa atema vote agüja liasü.

# Myanmar military sorkari conscription law benokogo

**Yangon, Tsüklai/February 11 (Agencies):** Myanmar nung sorkari linük nung lanur tetsür tebur ajak kecha taitok makai military nung tenzüksü atema sangdonggogo. Linük nung mepetmesü maneni adoker aliba mapang ka nung tang iba osang ya sangdonggogo.

Army-i 2021 küm February ita civilian sorkar atsüngtokba sülen Myanmar nung mepetmesü tulu adoker lir.

Ajisüaka tawa kin balala indang telungpur teloktem aser coup anema raratemi rara aika nung military kokoa arudar.

Honibarnü sangdongba jenjang kübok tebur arishi küm 18 nungi 35 ashi aser tetsür arishi küm 18 nungi 27 tashi küm anabosa military command kübok tenzüksüla ta shia lir.

Iba dak sendakba nung osang tejangja kecha magütsü. Ajisüaka junta-i sangdong ka ajanga ashiba agi, parnok indang defence ministry-i tenüngdakba ozüng, inyakyim aser tetuyuba tem agütsütsü.

Ita ishika tsüngda military maksütsüsa tamakok aika ngua arudar.

Taoba küm tatemlen Shan State nung kin balala telungpur telok asem aser sorkar anema nokdakba teloktem longjem aser parnoki arrtsü nung lenmang aser crossing tem azüokogo, koba China den shishilembatsü atema kanga tongtibang tesem aser lenmangtem lir.

Taoba ita Arakan Army (AA)-i ashiba agi, parnoki Chin State nung Paletwa tesem atsünggogo aser Meewa tenem

kolak nung amenoker aliba Paletwa jila nung military post tatembangbuba atsünggogo.

Military-i shimba Myanmar tir Myint Swe, shiba taoba mapang general ka liasü, pai taoba mapang, sorkari telungpurtem aser tanga telok balala mazioktetra linük loksa aotsü ana nung lir ta tekümdangtsü metetdaksüogoo.

Conscription atema temelaba agüja Myanmar nung ozüng ka 2010 küm agizük, ajisüaka iba ozüng ya tang tashi mebenoki liasü.

Iba temzüng ozüng kübok nüburttem military nung mapa ya jongdak mapang nungbo küm pongu tashi atsülangtsü akok ta shia lir. Shirnoki linük tenzüksü atema ajaba sentoka toktsüdir parnok küm kwi atema tenzüksü liasü paipikaji tepuokdak ayutsü.

2021 küm military sorkari linük ajunga nung state of emergency ka benoka liasü aser ano tawa iba emergency ya ita trok atema atsülanggogo.

2011 küm democratic sorkar mamenok tsüngda Myanmar ya küm 50 shi military yimsüsüba kübok kanga mepetmesü tulu nung aruogo.

Iba sülen maneni nüburttemi shimba sorkar ya military-i atsüngtok aser 2021 küm February 1 nü military-i parnoki sorkar atsüngba sangdonga liasü.

Civilian sorkar atsüngtokba sülen linük nung tang tashi raratep manener aser nisung miyirejang aika tepsetba den million aika pei talidak ki toktsür jenshiaogo.

*(Maneni tapak 8 nung...)*

# Israel-i Rafah yimti amaktsü renemer, linük balalai tekum dangtsü ashir

**Jerusalem, Tsüklai/February 11 (Agencies):** Gaza south tsütsü Palestine nunger refugee tem adenshia aliba Rafah yimti amaktsü Israel sentong aliba atema linük balalai tekum dangtsü ashir.

UK Foreign Secretary David Cameron-i iba tesem nung Gaza nütsüng yongsük tesadang dak tema jenoka lir ta ashi, aser Dutch Foreign Minister Hanke Bruins Slot-ia civilian aika asütsü ta ashi.

Rafah ya amak nungbo takoksa tulu ajurutsü, ta Saudi Arabia-i tekum dangtsü shiogo.

Gaza nung yimsü asüba Hamas telokia civilian meyirijang aika asütsü ta ashi.

Operation kar danga agira Gaza nung Israel nunger pua aliba chioktsü asoshi jembishinüba nung tetsükdaktsü ajurutsü, ta Hamas teloki Deobarnü ashi.

October 7 nü Hamas teloki Israel south tsütsü nisung 1,200 dak tema tepseter ano nisung 240 shi pua bener aoba



Israel-i tayimtsü amshia Rafah, Gaza Strip amakba sülen Palestine nungertemi ki o jen raksar aliba repringba noksa nung angur. Israel-i Palestine nunger aika jenoka aliba Rafah region nung tayimtsü amshia amak tenzükgoo, kong nüburttem timtem balala ajurua alir.

sülen Israel-i Palestine nunger aliba Gaza amak tenzükgoo.

Gaza nung Hamas teloki ketdang asüba health ministry ajanga, yashi Israel mitkar temi Palestine nunger nisung 112 tepsetogo aser tang tashinung asüba nisung 28,100 dak tema aser yiruba nisung

67,500 dak tema lir, ta Deobarnü ashi.

Rafah nung alirtem ya aika pei kidang nungi jena arurtem lir.

Hamas anema tali raratsü asoshi Israel Ato Kilonser Benjamin Netanyahu-i par sepaitem dang iba yimti nungi

tamakoktsü. Rafah nung inyaksangshi aika alinung civilian tem ainshitsü nungaker," ta Netanyahu indang office ajanga ashi.

Hamas-i tan tesüsa ceasefire terms benokba ato kilonseri magizük.

US-ibo tang Gaza amakba nung shilem ka ama Rafah amaknungbo tesama tulu aitsü, ta tekum dangtsü shia lir aser ano European Union aser United Nations nunga tebilemtsü lemsatepogo.

Egypt den arütsüa alilen yimti nungi nisung ajak anizüker aotsü tamakoktsü, ta aid groups temi ashir.

Israel sepaitemi iba yimti amak tenzükra nüburttem taolen mali, ta tawa Gaza semdangsang UN humanitarian co-ordinator Jamie McGoldrick-i ashi.

Gaza Strip nung Israel mitkar temi amakba mechi Palestine nunger million 1.5 shi Rafah nung jenoka lir ta ashir. Parnok ya timba süki nung alir.

civilian tem anizüker aotsü renemang ta totuyuba agütsür anogo ka sülen Deobarnü linük balala nungi tekum dangtsü osangtem agütsür.

"Hamas mesamatsüi aser Rafah nung Hamas battalions pezü yutsür iba rara indang nükjidong tongtettsü

# Pencak Silat Nagaland Olympic nung asayatsü



**Dimapur, Tsüklai/February 11 (TYO):** Sobaliba martial art asaya Pencak Silat ya tang mezüngbuba taruba Nagaland Olympic and Para Olympic Games 2024 aser North East Olympic Games 2024 nung asayatsü atema telemtetba agiogo aser iba ajanga NE nung aliba lanurtem atema lenmang tasen lapoktsütogo. Deobarnü osangbenertem den sensaksemba mapang Nagaland Pencak Silat Association Tir Khevishe Sema-i, tang mezüngbuba Pencak Silat ya Nagaland Olympic Games nung

züngoksemogo aser anogo ana Pencak Silat tetoktepa mapang asayar 72-i shilem agitsü, ta ashi. Association-i iba asaya atema takokba tashi renemdar aser iba ajanga asayatem nem parnok sempet sayatsü asoshi sabang tajung ka lapoktsütsü, ta paisa shisem. Paisa, Pencak Silat ya 37buba National Games 2023 nunga asayaogo ta ashiba den Indian Pencak Silat Federation nung state aser Union Territories 32 züngoksema lir ta shisem. Kasa mapang nung

Association-isa, taruba Nagaland Olympic & Para Olympic Games 2024 nung iba asaya asayatsü asoshi benokba atema Nagaland Olympic Association, Department of Youth Resources & Sports, Nagaland dang kanga pelaba lemsatepa liasü. Maneni Tir-i, 3buba North East Olympic Games 2024, March 18 nungi 23 tashi Nagaland Olympic Association aser Department of Youth Resources & Sports, Nagaland na longjemer Nagaland nung ayongzuka asayatsü lir, ta ashi.

# Maxwell-i T20I century pongububa yangluogo

**Tsüklai/February 11, 2024 (Agencies):** Deobarnü Adelaide nung West Indies den Twenty20 international asaya tanabuba asayaba mapang Glenn Maxwell-i ball 50 nung T20I century pongububa yanglua India captain Rohit Sharma-i otsü tasen ka yanglur aliba den kasa kümogo. T20 asaya asem asayatsü aliba ya Australia 1-0 agi tejakdang liasü aser Deobarnü mezüng bat ametsü maongka agütsüba sülen parnoki over 20 nung asayar 4 out sür run 241 yanglua liasü. Iba asaya nung arishi küm 35 tain asayar yagi kanga junga asayaogo. Australia team-i over


tenetbuba nung asayar 3 out sür run 64 yanglur aliba mapang Maxwell batting ameni ia liasü. Pai, six ti aser four 12 züka cenruty yanglu aser pai ball 55 nung out mesüi run 120 yanglua liasü. Maxwell aser Marcus Stoinis (16) na senteper run 82 yanglu aser iba sülen Tim David (ball 14, run 31) den senteper run 95 yanglua liasü. Maxwell-i T20I asaya 102 nung run 2405 yanglur lir. Pa indang average 30.83 aser strike rate 155.26 lir. Iba den pai century pongu aser half century 10 yanglur lir. Kasa mapang nung Rohit-i T20 asaya 151 nung century

pongung yanglur lir. Pa indang average 31.79 aser strike rate 139.97 lir. Iba den India captain yagi half century-a 29 yanglur lir. Tang T20I nung century timtiba yanglurtem rongnung Suryakumar Yadav tanabuba jenjang nung lir. Pai asaya 60 nung century pezü yanglur lir. **T20I nung century timtiba yanglur alirtem:** Glenn Maxwell (Australia) - 5 Rohit Sharma (India) - 5 Suryakumar Yadav (India) - 4 Sabawoon Davizi (Czech Republic) - 3 Colin Munro (New Zealand) - 3 Babar Azam (Pakistan) - 3.

# International High Jump Gala Elmos: Tejaswin-i gold angu

**Tsüklai/February 11, 2024 (Agencies):** National record bena alisang Tejaswin Shankar-i 2024 season kanga junga tenzüka International High Jump Gala Elmos 2024 athletics meet nung high jump asaya kokogo. Taoba küm October sülen tang mezüngbuba asayamung ka nung shilem agiba mapang Tejaswin-i Honibarnü World Athletics Indoor Tour Challenger nung 2.23m jukteta gold medal ngua liasü. Kasa asaya nung Jesse Sandesh-ia shilem agi aser pai 2.09m jukteta 10buba nung tembanga liasü. Arishi küm 25 tain asayar

arudar aser Paris 2024 Olympics atema qualify asütsü merangdar, kong tebur high jump nung qualifying standard ji 2.33m lir. Iba ita tetenzüklen Ministry of Youth Affairs and Sports (MYAS) indang Mission Olympic Cell (MOC)-i senden ka nung Tejaswin-i pa Europe nung continental tour event nung shilem agitsü atema senotsü teyari meshiba agizüka liasü. Belgium nung asayamung tembanga sülen pa Nehvizdy, Czech Republic nung February 20 nungi tenzüka Hvezdy v Nehvizdech athletics asayamung nung shilem agitsü.



# Bellingham Mongolbarnü RB Leipzig den masayatetsü akok

**Tsüklai/February 11, 2024 (Agencies):** Honibarnü La Liga nung Girona den asayaba mapang tetsüng teloktep yiruba sülen Jude Bellingham, Real Madrid pur RB Leipzig den Mongolbarnü Champions League last-16 first leg asayatsü aliba nung masayatetsü akok. Arishi küm 20 tain England nung midfielder ya Girona goal 4-0 agi akokba asaya nung goal ana idaktsüba sülen yiruba ajanga tuguatoktsüsa aküm. Madrid puri pa koba

mapang tashi ka nungi asayatetsü iba indang osang kecha magütsü aser ashiba agi, pa temang anepalua alitsü. Iba asaya nung goal ana tashi idaktsüba sülen Bellingham-i Real nungi asaya 31 nung asayaba mapang goal 20 idaktsüogo. Iba asaya nung Carlo Ancelotti-i aniba team nungi asayar Vinicius Junior aser Rodrygo natia goal kaka idakja liasü aser parnok table nung point pongu agi timba sür temaba jenjang nung lir.

# Jack Leach India den tanungba Test nung masayatetsü



**New Delhi, Tsüklai/February 11 (Agencies):** England nung left-arm spinner Jack Leach, India den tang asaya aliba Test asayamung nung tanungba asaya asem nung shilem magitetsü. Pa temekok yiruba ajanga asayamung nung tanungba asayatem nung shilem magitetsüsa kümogo. Iba asayamung nung India aser England ya Test asaya pongu asayatsü lir aser tang tashi nung team anapronglai kaka koker lir. Hyderabad nung mezüngbuba asaya ya England-i akok aser Visakhapatnam nung tanabuba asaya India-i koka liasü. "Hyderabad nung England team-i mezüngbuba Test

akokba asaya nung Leach yirua liasü aser ibayongji pa Vizag Test nung masayatetsüsa aküm," ta England aser Wales Cricket Board-i Deobarnü sangdong ka ajanga metetdaksü. "Pa taruba ghonda 24 tsüngda Abu Dhabi nungi kidangi aotsü, kong England team Rajkot nung Brehostibarnü (Feb 15) nungi tenzüka tasembuba Test masaya tsüngda anenzüka lir. Rehabilitation dak sendakba nung Leach, England aser Somerset medical team tem den sendaktepa inyaksanghitsü," ta Board-isa metetdaksü. Maneni ECB-isa, tanungba asaya asem asoshi Leach melener shinga meshimtsü ta metetdaksüogo.

# Myanmar military sorkari... (Tapak 7 nungi...)

Kasa mapang nung military pur telungpur telok balala den raraba mapang rara aika nung tamakok ngua arudar aser iba mapang sepaitem aika jenshia aotsüsa aküm aser iba ajanga parnok pusemertem yongtsü nung temulung melemtep tenzüko. Sepaitem jenshia aoba mapang tawa India-ia arrtsü adena Myanmar sepaitem aika jena aruogo, kechiyong parnok indang post tem telungpurtemi atsüngba ajanga parnok jena aotsüsa aküm. Myanmar nung military-i sorkar atsüngba sülen

nüburtemi iba anema nokdakba mapang sepaitemi tashiyim amshia nüburtem aziüoka arudar aser iba ajanga mangatettep tali akümer aser nisung taküma aika samaogo. Iba den külemi ano military-i telungpurtem atemer yimtsüng balala tayimtsü, drone aser artillery amshia amakba ajanga yimdaklirtem aika taküm samaba den pei yimtsüng toktsür jenshia aotsüsa kümogo. Maneni military-i yimden yimsüsüba dak sendakba nung taoba sorkar kübok lenirtem aser activist tem aika tepuokdaki yokogo.

**BILEM DANGANG**  
**"Anisüngzük makai mapa dang inyakbajia tamashi."**